

## **YAPIRUJI**

(Génesis)

Yapiruji quirica quisa epuani Tata Diusu ja yahua ataidha, deja neje ataidha. Quisa epuani deja sa equene jucha. Quisa epuani daja huecha israelita cristiano cuana anipiruidha su. Moisés ja deretaidha.

### PUPIRUIDHA YAHUA

Tata Diusu ja ataidha yahua (Gen. 1)

Yapiruji Tata Diusu ja ataidha buepa, yahua neje. Pamapa apuda puidha. Aimue ai biame id'eti, badi, atujai.

Daja su da, Tata Diusu puidha:

—Hueda paani.

Hueda bataji puidha.

Tata Diusu puidha:

—Hueda banime epu tsine. Apuda banime epu dhidha.

Ye puidha equene tsine.

Beta tsine jenetia Tata Diusu ja ichaderataidha yahui, judu bataji papu puji buepa su, mar bataji papu puji buepa ema su.

Quimisha tsine jenetia ichaderataidha yahua jenetia yahui Diusu ja. Ataidha huecha nutsa, id'ene cuana neje. Pamapa aqui cuana jajaji cama ataidha.

Pushi tsine jenetia buepa su ichataidha id'eti Tata Diusu ja tsine pad'iati puji. Tata Diusu ja badi ichataidha, atujai cuana neje, hueda epu puji dhidha su.

Pishica tsine jenetia ataidha Tata Diusu ja se cuana, ena su aniji animalo cuana neje. Ataidha d'ia cuana, pia cuabetsaji cuana neje. Diusu ja ataidha:

—Meyapacatique, buepa esejea puji, yahui esejea puji.

Sucuta tsine jenetia yahua su aniji animalo cuana ataidha Tata Diusu ja. Bacua, cuchi, uchi, huaca, iba, huabuquere, huabu, pamapa animalo ataidha Tata Diusu ja.

Tusa mimi neje hue ichataidha pamapa Tata Diusu ja. Pamapa saida bataidha.

Tata Diusu ja ataidha cristiano cuana

(Gen. 1 y 2)

Daja a putsu, Diusu ja ataidha deja. Med'i jutujutu jenetia ataidha tueda. Id'ediataidha Tata Diusu ja. Tueda deja Adán banime puidha. Da su, Diusu ja ataidha huerto Adán ja painatsihua puji. Deja ja ebani ichataidha animalo cuana sa.

Diusu puidha:

—Ecuatsasiata tueda deja ja animalo cuana.

Siete tsine jenetia Tata Diusu janahuidha mesa mudu jenetia.

Neicha hue Diusu daja puidha:

—Saida mahue deja tu mehua eneti. Paiti mesa ebutse.

Daja su tahuimetaidha Adán. Adán sa eparairi jemitaidha Diusu ja mesa ehuané ya puji. Beju id'ediataidha Adán. Bataidha mesa ehuané puji Adán ja. Ehuane ba putsu, beidaji puidha.

Tsada bataidha.

Jahuijati Adán, Eva anidha. Jahuijati biame, mue metse sa bidhu. Epuna sa ebani Eva puidha. Tata Diusu nime hue beju tuatseda puidha. Diusu ja ataidha tse:

—Paani metse sa ebacua cuana dueji. Metseda da animalo cuana ecuatsasia. Ejaja cuana metse sa jana epu. Ejaja cuana animalo cuana sa ediaji huecha epu.

Daja su, pamapa mesa ai cuana ajiji bataidha Tata Diusu ja. Saipie hue bataidha.

Equene deja ja madhada hue ataidha (Gen. 3)

Equene su yahua saida puidha. Adán sa mesa ehua neje aniji mesa huerto anidha. Banime puidha mesa huerto Edén. Saida quita mesa huerto puidha. Tata Diusu ja ataidha:

—Mediaque hue ai ejaja cuana yani huerto su. Cuaja dia taji mahue piada aqui su bahui. Tueda edia su, bahue epu metseda ahua madhada hue ahua saida. Ahua metse edia su da, metse emanu.

Bacua ja baseaja ataidha cristiano detse.  
Setameja ataidha Tata Diusu. Piada tsine  
quisabataidha epuna bacua ja:

—¿A mi Diusu ja cuatsasiataitia pamapa  
aqui sa ejaja cuana aimue metse edia puji?

Epuna ja jeutsutaidha:

—Pamapa dia cua hue huerto su aniji  
ejaja cuana. Diusu ja etseju ataitia: "Pamapa  
su mediaque. Eduju su piada enetijiji aqui  
jenetia be mediaji hue". Ahua etseju dia cua su,  
ahua etseju d'apaba su, manu cua da etseju.

Bacua ja ataidha:

—Aimue de metse emanu mahue, ahua  
metse edia ye ejaja su. Bahue da metse epu  
Diusu nime. Bahue da metse epu ahua saida  
ahua madhada hue.

Daja su saida bataidha jida ejaja epuna ja.  
Diataidha. Tiataidha mesa yahue. Tueda  
diataidha. Dia putsu beju, jabatidha tse  
jahuijati. Bidhuta da bataidha tse.  
Iyubataidha tse da. Jaataidha tse ejud'uji  
eina aida jenetia.

Tata Diusu ja juseataidha tse (Gen. 3)

Tsinecua pueidha Tata Diusu su, aqui duju  
su jarubutidha tse da. Diusu ja ihuataidha deja:

—¿Juque mida, Adán?

Jajeutsutidha Adán:

—Id'abaitia mida. Iyuname da ema puitia.  
Jahuijati putsu, da ema jarubuitia.

Tata Diusu ja quisabataidha:

—¿Aiya mida quisataitia mi jahuijati?

¿A mi diaitia jida ejaja yama mi quisaitia:

"Be diaji"?

Jajeutsutaidha Adán ja:

—Epuna mi ema tiaitia tuahueda ejaja  
ema tiataitia yama edia puji.

Tata Diusu ja ataidha epuna:

—¿Ai mi puitia?

Eva ja jeutsutaidha:

—Bacua ja da ema baseataitia. Daja  
putsu da, ema diaitia.

Diusu ja da bacua ataidha:

—Madhada hue mida puitia. Madhada  
chidi mi. Daja putsu da, ye tsine jenetia,  
mida yase mique etsedu su. Mida epuna neje  
edujubati metse. Epuna sa ebacua ja mida  
echuatarata. Mida mesa ehuatsitiadhi su  
edia.



Tata Diusu ja daja epuna:

—Ebia su quita mique neda epu cuinaja su.  
Mique yahue ja mi ecuatsasiata.

Tata Diusu ja deja daja ataidha:

—Diaitia mi jida ejaja, "Be diaji", mi yama  
aitia biame, diaitia. Da putsu, ebia su mida  
emudumudu pamapa mique jana jepuiti. Aquid'a  
cuana da emuru yahua su beju.

Cuinanaitia mida yahua jenetia, neicha da  
mida esiapatiyu yahua su.

Daja su ebiti jenetia mesa ejud'uji  
ataidha Tata Diusu ja Adán sa puji, Eva sa puji.

Tata Diusu ja juseaenitaidha tse huerto  
jenetia, mue tusa mimi id'aba ataidha tse  
putsu. Huerto sa enubiji su netiataidha  
beta mesa ecuatsasiaji espada eutsuneti neje.